



## QUÆSTIO MEDICA,

### QUOD LIBETARIIS DISPUTATIONIBUS

manè discutienda in Scholis Medicorum, die Jovis decimâ-  
nonâ Februarii. 1705.

M. PHILIPPO FONTAINE, Doctore Medico, Præside.

*An primorum corporis naturalis principiorum cognitio, Medico necessaria?*

I.

**N**UNQUAM ferè medicina non fuit; homo enim, animal illud plenum rationis & consilii, *ἄνθρωπος, ζῷον*, divinæ artis opus, & ad Dei ipsius imaginem factum, vix è manibus creatoris exierat, cum datum ab eo interdictum, sibi ac posteris, boni, malique nocendi funestâ spe & ambitione, violavit: arque hinc illi, ut prima mali lates, ita morborum & semoti prius lethi dura necessitas. Huic ut neceretur moras, illis ut auxilium afferret, inventa Medicina est, quæ morborum observatione & remediorum usu continetur. Paucorum illa & affectuum & auxiliorum fuit inter initia cognitio; sed cum prementibus morbis, suo quisque dolori solatium quæreret, & quæcumque fors offerebat, profutura, nocitura ve forent, incertus, arriperet, factoque periculo omnia tentaret, multiplicatis in dies experimentis, ex parvis, ut sæpe fit, exordiis paulatim amplificata & in artem redacta est. Sic primos in orbe Medicos necessitas, & per varios usus, artem experientia fecit; quæ, cum ad omnes pertineret, brevi crevit medicorum numerus, & non exerceri tantum medicina, sed & doceri, suosque habere Professores capit. Variâ à variis itum est viâ; nulla omnibus penitus & æque arrisit, nec elapsis tot sæculis, adhuc dum arridet: alii sola experimenta & observationes; alii rationem & subtiliorem philosophiam, sive primorum, è quibus naturalia corpora sunt, Principiorum cognitionem; alias alii artes ad medicinæ & medicorum perfectionem adhibendas, necessariaeque esse mordicus tuiti sunt, nec pauci, nostris his temporibus etiam contendunt. In hoc opinionum dissidio, cave ne quid, promovendæ artis animo, in eam inducas, vel extraneum & inutile, vel ægre, nullove obtinendum modo, dubiumque & incertum artificem, artemque ipsam quæ jam nimio plus longâ est, & in quâ, si alibi, difficile judicium, multo longiorem magisque intricatam & difficilem reddas.

**A**R S ut præstantior nulla, & hominibus necessaria magis, quæque ad Deum propius accedunt, sic illis nulla carior quam medica, acceptiorque est; Eam Reges & Imperatores ipsi, quibus artium sola imperat, gradusque est ad Principatum, addiscere & exercere alias solebant, & nunc quoque nostri ferè omnes in amoribus & deliciis habent, ejusque Professores magnis præmiis & honoribus sibi alligant, suisque & urbibus & exercitiis studiosè procurant, tantique faciunt, quanti suam & suorum sanitatem ac vitam. Nullibi interim præsentius discrimen, & calculum medicus malè ponit; nullibi proclivior & facilior lapsus, si vera ille & genuina artis saluberrimæ fundamenta perspecta & explorata non habet. Quantas itaque curas, quantas animi contentiones & vires, in eorum delectum impendere medentem oportet, ne, dum novas ad augendæ, ditandæque medicinæ rationes, vel ipse excogitat & animo fingit, vel ab aliis inventas accipit, Artem benè constitutam temerario malorum Principiorum abusu labefactet. Quà in re, si secum reputet quæ medicinæ initia fuerint, qui progressus, quæ Amplificatio, & unde, quibusve auxiliis ad hunc præclarum, in quo nunc eminet, pervenerit statum, si non perfectionis, perfectioni saltem proximum, statim inferet, statuetque ab iisdem sibi non esse recedendum, cum, quæ artis ortui & incremento sola præfuerunt, eam illa quoque sola perficere, ac medicum numeris omnibus absolvere possint. Ne quid tamen prætermisisse videatur, novas illas examinet rationes quibus & arti & artifice magnam perfectionis accessionem & quasi cumulum, earum authores, jure an injuriâ, adpromittunt.

## I I I.

**Q**U A M parum vero utilitatis & fructus redundare in medicum & medicinam, ex illâ primorum principiorum cognitione, possit, quæ nulla est vel plurimum incerta atque anceps? nullam esse si verbis negent philosophi, vel hoc ipso, quo appellari volunt nomine, consentiant; si incertam & ancipitem, eos ingens illa, quâ laborant in statuendis primis mixtorum principiis, convincit discordia. Quid enim aliud est hodierna sapientia, quàm primorum principiorum jugis & perpetua, non cognitio sed inquisitio, aut si mavis obstinata concertatio, ac varia variarum opinionum, summo cum animorum æstu semper, jurgisque interdum, agitata dissensio? fuerit cum animâ infusa primùm Adamo vera & perfecta sapientia; illius sanè peccato extincta est in posteris, necdum illorum laboribus & vigiliis reviviscit certa illa & evidens rerum naturalium per proprias causas cognitio, quâ præditum fuisse, primum hominem aiunt, quæque vera idæa & ab omnibus recepta est sapientiæ definitio. Illam omnes ambiunt quidem, nemo autem hæcenus assecutum se esse gloriari, nec assecuturum unquam sperare merito potest, nec tam ipsam sapientiam in sapientibus vulgò dictis quàm sapientiæ, umbram dicere non auisim vel simulachrum, sed studium & amorem deprehendere est. Quid porro studium illud sapientiæ, quid clamosa & disputationibus atque tricis plena disciplina conferre ad medicinam queat? quæ muta olim ars erat

atque utinam si non muta & elinguis, non adeo saltem verbosa nunc foret, nec tam multa in loquendo! An aliud quid præter incerta & controversa principia, & ex illis ortas & nunquam dirimendas quæstiones? si dubites, philosophorum lege scripta, scholas adi, quæ in his, illisque disputentur, auribus & oculis accipe; Problemata penè omnia, & propositiones in utramque partem agitata, atque ideo fortasse auditoribus factas, ut quod certum videtur & indubium, incertum argumentando & ambiguum evadat, ac de ipsâ veritate dubitare probabiliter possint, quodque experientiâ vel naturæ instinctu sciunt, nescire se fallaci ratiocinii subtilitate circumventi putent.

## I V.

**V**ERUM alius sit sapientiæ finis, alia philosophorum exercitatio, bono animo disputent de rebus, eas ut cognoscant & verum à falso distinguant, cum incomprehensibilis natura sit, an id sperare eorum quisquam ausit? incomprehensibilem verò esse vel hinc patet, quod, quibus ex principiis mixta consentur, ne ipsi quidem sapientes consentiant, quotque eorum capita, tot ferè sensus, stupenda opinionum multiplicitas, infinita diversitas. Adstruunt alii principia quæ sub imaginationem, non sub sensus cadunt; Alii quæ solo percipiuntur intellectu; Plurimi ea tantum quæ cognosci sensibus possunt. Jactant Pythagoræi numeros, juxta quos universa fiant; Ideas Platonici rerum omnium prototypos, mentemque præterea ubique diffusam, quæ mundi velut anima sit; Materiam formam & privationem Peripatetici; Atomos Epicurei & numero infinitas & magnitudine tenuissimas & figurâ diversas, quæ per disseminata ubique vacuola, perpetuo cientur motu; Triplex Cartesiani materiæ genus, subtilis, globosa & ramosa seu crassa, aiuntque subtili constare quæ lumen emittunt, globosa quæ transmittunt, crassa quæ remittunt; Antiquorum plurimi, ignem, aërem, aquam & terram, alii quidem seorsum, alii verò conjunctim sumpta; Mercurium, sal, sulphur, aquam & terram, Chymici pro principiis statuerunt. Cætera quid persequi sigillatim juvat? diversa à diversis scriptoribus vulgata rerum principia; Vix ullum sine aliquâ conjecturâ aut specie rationis: Quænam verò similior hypothesis, suo quisque arbitrato & ut affectus est, statuere potest, quæ vera, nemo potest, ne sapiens quidem; Qui hominum disputationibus tradidit mundum, is novit solus. Cum itaque de primis rerum principiis nondum conveniat inter philosophos, nullam quoque esse illarum cognitionem, aut saltem omnino mancā & ancipitem, quis inficias eat? vanamque idcirco & inutilem futuram, quam in iis investigandis operam medici collocarent, incertumque & difficile judicium, quod de morborum causis & remediis in tantâ rerum ignoratione ferrent.

## V.

**S**CITE itaque & prudenter sapientiæ studium, quod aliquibus ante sæculis quorundam mala mens aut imbecillitas invexerat in medicinam, & quam perdidissent tandem, ab eâ separavit Hippocrates; Notabat enim divinus senex, nullum esse, nec futurum unquam altius inquirendi

finem, nunquam conquiescere posse medicorum animos & in alienâ re nimum esse curiosos; Quod ne iis & ægrotantibus noceret, à salutari professione hypothefes, omnia systemata exulare iussit, & inanibus principiis utilia, incertis certa substituit. Quæquæ ab observationibus & experimentis ducta erant & sine ordine dispersa theorematata, summâ curâ & studio collegit & in unum corpus cômpegit. Quibus ille solis adminiculis, peritissimi medici nomen sibi & famam confecit, adeoque suis in excelsis fuit, ut si locum ei non tribuerint inter Deos, honores saltem divinos & quales Herculi & Apollini decreverint; Ipseque Imperator Justinianus illius auctoritatem ceu legem aut legis rationem esse voluerit, in pandectis, ubi & summum virum appellavit. At, quæ nostrorum hominum iniquitas est, aut vecordia! Etiam quæ sit via quâ ad medicinâ apicem rectâ ille pervenerit, non ignorent, eâ non contenti, aliam inconsideratè & intemperanter inquirunt & sequuntur, (quæ tota devia est, & in explicabilis, tandemque post infinitos errores in labyrinthos agit) & studium sapientiæ rursus in medicinam intrudunt. Ne tibi verò in animum induxeris, ratione & aliquâ philosophiâ in arte condendâ, ejusque exercitatione, usum non fuisse medicinâ dictatorem, eâque nolle, nos uti, Eam quæ circa causas evidentes versatur, iisque constanter adhaeret, nec ultra tendit, medicis necessariam; Quæ obscuras & latentes curiosius investigat, inutilem & noxiam cum Coo Præceptore, arbitramur; Illa regit artifices observationibus & experimentis instructos & illuminat; Hæc ab arte avertit, speciem majoris doctrinæ, & innumeris difficultatibus pene obruit, obscurisque & falsis quæstionibus excæcat. Medicum illa optimum nec animi pendentem quid consilii capiat apud ægros, hæc dubium semper & ancipitem facit, imo ne medicum quidem, alioquin sapientiâ studiosos, maximos medicos esse oporteret, quibus tamen verba tantummodo supersunt, deest medendi scientia,

*Non ergò primorum corporis naturalis principiorum cognitio, Medico necessaria.*

#### Domini Doctores disputaturi.

*M. Petrus Azevedo.*

*M. Franciscus Aignan.*

*M. Franciscus Picoté de Bolesfre.*

*M. Joannes Herment, Medicus  
Regis ordinarius utriusque  
Aula Equestris.*

*M. Jacobus Fontneau.*

*M. Nicolaus Bailly.*

*M. Stephanus Franciscus Geof-  
froy, Regiæ scientiarum Aca-  
demia Parisiensis, Regiæque  
societatis Londinensis Socius.*

*M. Ludovicus Franciscus  
du Tal.*

*M. Joannes Daval.*

Proponebat Parisiis JOANNES-BAPTISTA MONGIN,  
Regulensis, Baccalaureus Medicus. A. R. S. H. 1705.

Apud Viduam Francisci Muguet, Regis & Facultatis Medicinæ Typog: